

3 JUAN

Gayodih át túyat tútat

¹ Weém Juan, Jesúíhwādh waóhni, meém Gayo, búdí wā oinidih nin núodih wā daác wahna caá.*

² Wā dée panihni, wā oini, Dios bíicdih ma túi jumatdih wā jéihna caá. Caán bíicdih ma túi jumat pah, ma túi yapat pínah, míih bácahbut ã túi jumat pínahdihbut meemdih wā úbhna caá. ³ Biquína Jesúíhwā wā pebhna joinít, ded pah ma jumat doonádih jwiít dih ĩ naáwáp be. “Cristo ã náahat pahjeh Gayo yoobópdih apí chājna caá”, ĩ níj naáwáp be. Páant ĩ niijíchah joinít, búdí wā weñep be.*

⁴ Det wā bohénit, wā weh panihnit, Dios ã náahat pahjeh ĩ túi chājat doonádih joinít, búdí wāpí wēina caá.

⁵ Wā chéen, wā oini, Jesúíh doonádih bohé jibnitdih ma jéihca naáhwā ĩ jumuchah yuhna, ma teo wáacachah, ã túina caá. Pánih teo wáacna, jwí Maáh Jesús dih yoobópdih jepahni ma jumna caá. ⁶ Biquína queét bohé jibnit jwí pebhna joinít, jwiít Jesúíhwā jwí míic wáacachah, “Gayo jwiít Jesúíhwādh ã túi oina caá”, jwiít dih ĩ niijíp jī. Pánihna, ma pebhna ĩ jwúub jwibínachah, queét dih búdí ma teo wáacá, bohé péanit, ĩ túi jwúub jib bejat pínah niijná. Páant míic teo wáacatdih Dios áihwādh ã náah yacna caá. ⁷ Queét Jesúíh túini doonádih bohé jib bejna, Diosdih jéihcannitboó ĩ teo wáacat pínahdih ĩpí náahcan caá. ⁸ Pánihna, jwiít Jesúíhwāboó queét dih wēi jwááhnit, jwí teo wáacat dée caá. Pánih teo wáacna, queét bíicdih jwiítbut Dios yoobópdih ã naáwát dih bitadh jwí jéihyana caá.

* 1:1 Hch 19.29; Ro 16.23; 1Co 1.14

* 1:3 2Jn 4

Diótrufes yeejép ã chãjat

⁹ Caanjíh moón Jesúíhwãdih wã daác wahap yuh be. Obohjeéhtih, páant wã daacáchah yuhna, Diótrufes wūt jumni, caanjéh wutni jumíhna, weemdíh át jepahcap wut be. ¹⁰ Pánihna, ñi pebhna wã juibínachah, ded pah ã chãjatjidih yeéb Jesúíhwãdih wã naóh beedábipna caá. Weemdíh yeejép ãpí naóh yacna caá. Chah yeejépbūt ãpí chãjna caá. Jesúíhwã áih túini doonádih naóh jibnitdíh wēi jwãáhcan, áih muudíh ãpí waadát túutcan caá. Bitá caanjíh moón Jesúíhwãboó bohé jibnitdíh ñ wēi jwãááchah ennit, caánboó “Queét bohé jibnitdíh ñi wēi jwãáhca bojóó”, ãpí niij wutna caá. “Queétdih ñi wēi jwãáát jíib jwiít Jesúíhwã jwí míic wáacápboó ñi jwúub waadca bojóó”, ãpí niijná caá.

¹¹ Wã oini, det yeejépwã ñ chãjat pah chãjcanjeh, túi chãjnitboodíh ma en yacaá. Túi chãjnit Dioíhwã ñ jumna caá. Obohjeéhtih, yeejép chãjnitboó Diosdih jéihcannit ñ jumna caá.*

Demetrio ã túi chãjat

¹² Demetrio wūt jumniboodíh nihat cáacwã ñ túi wéhena caá. Dios ã náahat pah ã túi chãjatdih enna, túini ã jumatdih ñi jéihna caá. Weembút caandíh páant tígaa wã niijíp. Páant wã niiját yoobópdih ã jumatdih ñi jéihna caá.

Ã naóh péaat

¹³ Meemdíh chah naáwíhna yuhna, caandíh wã daáquihcan caá. ¹⁴ Waícanjeh meemdíh enedih wã bejíhna caá. Caanná juibínit, meemdíh wã míic wéhehipna caá.*

* 1:11 1Jn 2.29; 3.6,9-10 * 1:14 2Jn 12

¹⁵ Dios meemdíh ã teo wáaca naáh, ma túi jummat pínah
niijná. Ninjĩh jummit jwĩ chéenwābət meemdíh ĩ túyat
túutna caá. Caanjĩh moón jwĩ chéenwā nihat ĩ túyũ naáh.
Páant bóojeh tigaá wã naáwát.
Juan

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 12 Mar 2019 from source files dated 5 Mar 2019

34c9543b-57a6-5290-ab7b-4fa15529a7e2